

Powšitkowne WOZJEWJENJA

njedźelu, 8. januara 2012

Hodowny koncert w Chróścicach

Tradicionalny hodowny koncert Chróścanskeho cyrkwinskeho chóra wotměje so tutu njedźelu, 8. januara, w 14 hodź. w tamnišej wosadneje cyrkwi. W srjedźišću steji lětsa barokowa hudźba 17. a 18. lětstotka. Najwažniša hudźbna forma tuteje doby su cyrkwinske kantaty. Na lětušim koncerće w Chróścicach změje hodowna kantata Vincenta Lübecka „Witamy tebje, Zbóžniko“ swoju serbsko-rěčnu premjeru. Teksty tuteje twórby je Bernadet Hencyna do serbsčiny přenjesła. Dale zaklinči w programje mjez druhim „Magnificat anima mea“ wot Christopa Graubnera. Koncert, na kotrymž tež instrumentalisća a solisća z Drježdźan sobu skutkuja, nawjeduje Bernadet Hencyna. Wšitcy zajimcy su wutrobnje do Chróścic přeprošeni.

Kubłanskej dnjej

Pod hesłom „Žiwjenje je krasne – wo lubosći a druhich wěcach“ přeprošuje dekanatne dušepastyrstwo šulerki a šulerjow 7. a 8. lětnika wot pjatka, 27. januara, we 18 hodź. do soboty, 28. januara, w 16 hodź. do Don Boskoweho domu we Worklecach. Zajimcy njech so prošu hač do pjatka, 20. januara, pod telefonowym čisłom (03 57 96) 8 87 07 we Worklecach přizjewja.

Serbski krosnowar w putniskej hospodźe

„Na wjerškach swěta“ rěka swětłowobrazowy přednošk serbskeho krosnowarja Achima Miča ze Sulšec, kotryž budže sobotu, 14. januara, w Gerdesec putniskej hospodźe w Chróścicach. Započatk je w 19.45 hodź.

Pěši do Częstochowy

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podač. Hić smě kóždy sobu, kotryž je 18. žiwjenske lěto docpěl. Termin putnikowanja je wot 5. do 15. awgusta. Zajimcy njech so bórze přizjewja pola fararja Bena Jakubaša w Njebjelčicach, telefonowe čisło (0 35 78) 30 20 05.

Nowa wjeselohra „Naša ćeta Mija“

Dźiwadłowa skupina Kulowskeho Bratrowstwa přeprošuje wšitkich wutrobnje na wjeselohru „Naša ćeta Mija“. Hra předstaja so tutu njedźelu, 8. januara, w 16.30 hodź. w Salowje; pjatk, 20. januara, w 19 hodź. w Njebjelčicach; sobotu, 21. januara, w 19.30 hodź. w Chróścicach; njedźelu, 22. januara, w 16.30 hodź. w Radworju; njedźelu, 29. januara, w 16 hodź. w Haslowje, njedźelu, 26. februara, we 18.30 hodź. w Šunowje a njedźelu, 11. měrca, w 17 hodź. w Kulowje.